


四明叢書

張宗祥



正義曰文選陶徵士誄注引鄭君注柳下惠魯大夫
展禽食采柳下諡曰惠皇疏竊盜也凡在位者當助
君舉賢才以其匡佐而文仲在位知柳下惠之賢而
不薦之於君使與己同立公朝所以是素餐盜位也
朱注竊位言不稱其位而有愧於心如盜得而陰據
之也范氏曰臧文仲爲政於魯若不知賢是不明也
知而不舉是蔽賢也不明之罪小蔽賢之罪大故孔
子以爲不仁又以爲竊位蒙案臧文仲立言不朽柳
下惠爲聖之和二子在當時均非碌碌無聞者故識

海鳥之致災人莫不知惠之智譏逆祀之犯順人莫不知惠之仁犒齊師而受命有辭人莫不知惠之有禮也嫗奔女而坐懷不亂人莫不知惠之有義也納岑鼎而眞與不欺人莫不知惠之有信也家語襲大戴記將軍文子篇孔子謂子貢曰孝恭慈仁允德圖義約貨去怨輕財不匱蓋柳下惠之行也然則惠之賢文仲豈有不知者仲之智豈不足以知惠者況文仲與惠同爲魯之公族自僖公十六年季友卒至文公十年共計二十七年中皆係文仲執政迨仲死而

襄仲繼之則文仲之當國不可謂不專且久且其子
宣叔孫武仲相繼爲司寇則司寇乃臧氏之世職而
惠爲士師又屬秋官之下僚乃何以若不知其賢者
而竟令其三仕三黜焉豈以病犒師而一辭莫贊因
而嫉惠之才歟抑豈諫爰居而三筴徒書因而忌惠
之直歟意者夏父弗忌之逆祀仲實縱之將以希寵
而固位而惠直發之謂其犯順而不祥是彊察而不
肯屈柔從容雖誠信而不能與人無害則亦何怪仲
之知之而故黜之耶厥後夫子譏文仲以作虛器縱

逆祀祀爰居爲三不智而以下展禽廢六關妾織蒲爲三不仁誠以仲之黜惠罪在不仁而非不智也此經旣援一竊字以定其罪案復揭一知字以誅其隱衷於公叔文子之升僎而襄以爲文於臧文仲之蔽賢而貶以爲竊朱子以爲辭嚴義正卽聖人作春秋之意也文仲能立言庶幾三不朽乃欲揜其不仁而不得欲佯爲不智而又不能孟子曰不祥之實蔽賢者當之其又何說之辭

孔注云云疏曰云柳下惠展禽者左傳孔疏曰據魯

語展禽曰獲鬪之是其人氏展名獲字禽柳下是其
所食之邑名諡曰惠列女傳柳下惠死門人將諡之
妻曰夫子之諡宜爲惠乎莊子云柳下季者是五十
字禽是二十字案淮南子注云展禽家有柳樹身行
德惠故號柳下惠莊子注亦云居柳下蓋因地有柳
樹而遂以爲邑名歟展禽爲魯公族無駭之後應居
於曲阜而食邑則在柳下閻氏釋地據國策顏觸言
秦攻齊令有敢去柳下季壟五十步而樵采者死不
赦遂謂古人多葬於食邑以柳下當在齊南魯北接

壤處昔屬魯而後屬齊也然秦禁樵采安知非軍行所過之地耶

子曰躬自厚而薄責於人則遠怨矣

注孔曰自責己厚責人薄所以遠怨

也答

釋文遠于萬反春秋繁露仁義法篇引人作外

正義曰朱注責己厚故身益修責人薄故人易從所以人不得而怨之新安陳氏曰此卽成湯檢身若不及與人不求備之意修己待人當然之理也非謂求遠怨而後爲之遠怨乃自然之效耳黃先生曰過未

能無諸己而以非諸人德未能有諸己而以求諸人
取怨之由也不以己之所知者愧人不以己之所能
者強人遠怨之道也荀仲豫申鑒曰求己之所有餘
奪下之所不足捨己之所易責人之所難怨之本也
韓子言古之君子責己重以周責人輕以約又言乘
人不能揜以自取揜以媒怨以及於難皆同此意金
仁山考證曰呂成公少年性嚴急自誦此章之後德
量寬宏然則善讀此者非徒遠怨抑能懲忿或曰經
言遠怨言心自寡怨憾也蒙案躬身也自天子以至

於庶人壹是皆以修身爲本其所厚者薄而其所薄者厚未之有也此章之旨盡之於已則爲忠施之於人卽爲恕故大學以藏恕喻人爲絜矩中庸以求人先施爲庸德此忠恕一貫邦家無怨之道也

孔注云云疏曰皇疏引蔡謨之難孔云厚者謂厚其德也人若已所未能而責物以能故人心不服若自厚其德而不求多於人則怨路塞責己之美雖存乎中然自厚之義不施於責也其意以爲躬之自厚不可稱責無涉於人何以言怨抑知說文責訓求善求

其成惡求其改人己本可兼說經以厚薄對勘人己互闡中一而字爲轉關子爲專責人而不責己者示以忠恕一貫之道則怨字均有著落矣

子曰不曰如之何

注孔曰不曰如之何者猶言不曰奈是何也

如之何者吾

末如之何也已矣

注孔曰如之何者言禍難已成吾亦無如之何也

正義曰朱注如之何如之何者熟思而審處之辭也不如是而妄行雖聖人亦無如之何矣蒙案朱子以上兩如之何連讀爲心口商度之詞孔注以不曰如之何絕句如之何者略讀作先後反正之解春秋繁

露執贄篇子曰人而不曰如之何如之何者吾末如之何也矣是朱子所本也陸賈新語慎微篇曰孔子傷無權力於世大化絕而不通道德施而不用故曰無如之何者吾末如之何也已矣是孔氏所本也然繹此章之旨乃聖人欲人思患預防與上遠慮近憂互相闡發不曰如之何人無遠慮也如之何者必有近憂也故皇疏云不曰猶不謂也如之何謂事猝至非己力勢可奈何者言人生常當思慮卒有不可如何之事逆而防之不使有起若無慮而事歛起是不

曰如之何事也李充曰謀之於其未兆治之於其未
亂何當至於臨難而方曰如之何也皇疏申孔注頗
儉試更證之大學之卒章所云彼爲善之小人之使
爲國家不曰如之何也所云菑害並至如之何者也
雖有善者亦無如之何矣吾末如之何也已矣也注
疏之說正與大學相表裏又讀史記項羽本紀身經
七十二戰欲以力征經營天下竟不思人心已去天
命將亡迫勢窮力竭之時一則曰騅不逝兮可奈何
再則曰虞兮虞兮奈若何事至頻喚奈何而已無可

商量不能救藥蓋柰何則那本屬無聊之極思萬難之聲口一之已甚其可至再至三乎武虛谷以已訓止已矣二字別爲一句與本經通例不合

孔注云云疏曰如何猶柰何難詞也長言之曰如之何曰柰之何柰何之合聲曰邨曰儺與難一聲轉故以如何爲難詞不曰如之何不謂其難也黃先生欲合孔意於朱注謂疏本奪一末字當作末如之何者禍難已成蓋曲爲之通也

子曰羣居終日言不及義好行小慧難矣哉

注鄭曰小慧謂小小

之才智也難矣哉
言終無成功也

釋文慧音惠魯讀慧爲惠今從古皇本作惠文選檄
吳將校部曲文注御覽人事部引同

正義曰皇疏三人以上爲羣居黃先生曰言不及義
者不審是非可否之實而顛倒言之也好行小慧者
仗矜私自智之謀而剛愎行之也行小慧正由義
不明也蒙案義卽智者所務之民義乃天理人情之
至當民彝物則之常經學者平居所講貫日用所行
習而不可須臾離者也慧有才智之稱小慧卽小有
才如詩賦歌詞之類精小技而壯夫不爲陰陽術數

之流窮小道而多言必失下至皇疏所云安陵調諱
顏氏家訓所云彈琵琶解鮮卑語皆屬才智之小者
均無益於身心性命之功修齊治平之學而卒歸於
無用難望其有成故飽食終日子爲柔弱者言之恐
其心之不用安於愚而自棄也羣居終日子爲剛愎
者言之恐其心之誤用矜予智而自暴也夫人性非
不貴於慧而患在慧之小小慧似無傷於義而患在
好之專惟其不成大智所以不明大義惟其言無大
義因而行好小慧事以因循而不覺害以積習而彌

深孰知夫今日之小智乃異日之大愚人不小智不

大愚

淮南說山訓云人不小學不大迷不小慧不大愚

此之謂也孔子三朝

記曰小辯破言小言破義小義破道道小不通通道必簡故大智若愚亦大愚若智人可不端所好而務民義哉朱子以小慧爲私智故云放僻邪侈之心滋行險僥倖之機熟無以入德而將有患害是直好行不義而非言不及義矣似求之太深

鄭注云云疏曰釋文謂鄭本慧作惠攷說文惠从心惠聲惠或从慧作轉是慧與惠本通韓詩外傳五云

主名者其臣惠漢書昌邑王傳云清狂不惠注心不
慧也列子云逢氏有子少而惠韓非子說林惠子作
慧子皆其證也以慧爲才智者說文慧儇也齊語聰
慧質仁注慧解瞭也方言三知或謂之慧注慧瞭皆
意精明賈子道術篇亟見窺察謂之慧案小慧猶俗
所云小聰明故云小小才智也云終無成功者猶致
遠恐泥大事不成也故皇疏云以此處世難爲成人
也

子曰君子義以爲質禮以行之孫以出之信以成之君